

四庫全書

子部

欽定四庫全書

冊府元龜卷七百

宋 王欽若等 撰

牧守部

貪黷

夫天子所與共治者惟良二千石爾嗟乎風教陵遲廉恥凋喪見得思義幾何人哉徇利之夫厚顏斯甚荷析圭剖符之寵膺百城千里之寄而乃割剝氓庶讐斂貨財見金而不見人知得而不知喪識多積之可樂闇厚

亡之難悔貫盈惡稔顛沛隨之故君子辭富以求安知
足以遠辱者豈狗名安節至性之所存抑失身歿祀古
人之攸戒也繇漢以來居長人之任彰貪墨之迹者悉
條著於篇云

漢居益昌嗣湘城侯

臣欽若等按南粵傳桂林監居翁
注姓居名翁益昌即其子也而功

臣表云監
居翁誤也為九真太守坐盜使人出買犀奴婢贓百萬

以上不道誅

陳咸為南陽太守其治放嚴延年其廉不如所居調發

屬縣所出食物以自奉養

調徒均切

奢侈玉食

玉食美食如玉也

後漢歐陽歙自汝南太守徵為大司徒坐在汝南贓罪千餘萬發覺下獄

羊元羣罷北海郡贓罪狼藉郡舍溷軒有奇巧乃載之

以歸

溷軒
廁室

侯參中常侍覽之兄為益州刺史民有豐富者輒誣以大逆皆誅滅之沒入財物前後累億計太尉楊秉奏檻車徵於道自殺京兆尹遠逢於旅舍閱參車三百餘兩

皆金銀錦帛珍玩不可勝數

韋毅為陳留太守桓帝延熹九年坐贓自殺

左昌為梁州刺史靈帝中平初北地羌胡與邊童等寇

亂隴右昌等因軍興斷盜數十萬

斷謂割截

漢陽長史蓋勳

固諫昌怒乃使勳別屯河陽以拒賊鋒

河陽縣屬天水郡

欲因

軍事罪之而勳數有戰功昌坐斷盜徵

晉石崇為荊州刺史崇穎悟有才氣而任俠無行簡在

荊州劫遠使商客致富不貲

孫盛為桓溫從事中郎出補長沙太守以家貧頗營資
貨部從事至郡察知之服其高名而不劾之盛與溫牋
而辭旨放蕩稱州遣從事觀採風聲進無威鳳來儀之
美退無鷹鷂搏擊之用徘徊湘川將為恠鳥溫得盛牋
復遣從事重按之贓私狼藉檻車收盛到州捨而不罪
周仲孫為寧州刺史在州貪暴人不堪命

後秦周班為姚興始平太守以黷貨誅於是郡國肅然
北涼隗仁為沮渠蒙遜高昌太守為政有威惠之稱然

頗以愛財為失

宋劉式之為宣城淮南二太守在任贓貨狼藉揚州刺史王弘遣從事檢校從事呼攝吏民欲加辨覆式之召從事謂曰治所還白使君劉式之於國家粗有微介偷數百萬錢何有況不偷耶吏民及文書不可得從事還具白弘弘曰劉式之便如此亦可繇此得停

裴方明為潁川南平昌太守皆坐贓私免官

褚叔度為廣州刺史在任四年廣營資貨賄財豐積坐

免官禁錮終身

劉道錫為廣州刺史坐貪縱過度自杖治中荀齊文垂死乘輿出城行與阿尼同載為有司所糾值赦徵又以赦後餘贓收下廷尉被宥

王僧達為吳郡太守吳郭西臺寺多富沙門僧達求須不稱意乃遣主簿顧曠率門義劫寺內沙門竺法瑤得數百萬

桓閔為交州刺史閔罷州還資財鉅萬孝武末年貪慾

刺史二千石罷任還都必限使獻奉又以捕戲取之要令罄盡乃止閔還至南州值明帝即位擁南資為富人後為益州刺史蜀還之貨亦數千金先送獻物傾西州之半明帝猶嫌其少及閔至都詣廷尉自薄先詔獄官留閔於是悉送資財然後被遣凡蠻夷不受鞭罰輸財賣罪謂之賧時人謂閔被賧刺史

南齊崔慧景為梁南秦二州刺史在州蓄聚多獲珍貨王洪範為魯郡太守多取賸賄為州所按大懼棄郡奔

建鄴

梁王筠為臨海太守在郡侵刻還資有芒屨兩舫他物稱是為有司奏不調累年

江祿為武寧郡守頗育資產積錢於壁壁為之倒迤銅物皆鳴人戲之曰所謂銅山西傾雒鐘東應者也湘東王恨之既深以其名祿改字曰榮財以志其忿

蕭恭為雍州刺史武帝以雍為邊鎮運數州粟以實儲恭乃多取官米還贍私宅又恭典籤陳保印侵刻百姓

為荊州刺史廬陵王所啟被詔徵還在都朝謁白服隨
例帝曰白衣者為誰對曰前衡山侯恭帝厲色曰不還
我陳保印吾當白汝未已而保印實投湘東王改其姓
名袁逢恭竟不叙用

缺

為湘州刺史頗好積聚多寫圖書數萬卷有油
二百斛米四千石他物稱是

曹景宗為郢州刺史在州鬻貨聚斂於城南起宅長隄
以東夏口以北開街列門東西數里而部曲殘橫民頗

厭之

蔡樽為臨海太守百姓楊元孫以婢採蘭時與同里黃
權約生子酌乳哺直權死後元孫就權妻吳贖婢母子
五人吳背約不還元孫訴樽判還本主吳能為卒賂樽
妾遂改判與吳元孫搗登聞鼓訟之為有司所劾時樽
已去郡雖不坐而常以為恥

陳庾持監臨海郡以貪縱失民和為山盜所劫幽執十
旬文帝遣劉澄討平之乃獲免

後魏元志為揚州刺史耽好聲妓後為雍州刺史逾尚
華侈聚斂無極聲名遂損

元仲景為涼州刺史貪暴無極欲窺府人及商胡富人
財物詐作一臺符誣諸豪等云欲加賞一時屠戮所有
資財生口悉沒自入

元汎字普安為營州刺史性貪殘人不堪命相率逐之
汎走平州

元誕為齊州刺史在州貪暴大為人患牛馬騾驢無不

逼奪家之奴隸悉迫取良人為婦有沙門為誕採藥還見誕問外消息對曰惟聞王貪願王早代誕曰齊州七萬家吾到來一家未得三斗錢何得言貪耶為御史中尉元纂所糾會赦免

武昌王鑒為齊州刺史兄和罷沙門歸俗棄其妻子納一寡婦曹氏為妻曹氏年齒已長携男女五人隨鑒至歷城干亂政事和與曹及五子七處受納鑒皆順其意言無不從於是獄以賄成取受狼藉齊人苦之鑒治名

大損

鄧羨為東魏郡太守兼齊州長史在治十年經三刺史以清勤著稱齊人懷其恩德號曰良二千石及代還大受民吏送遺頗以此為損後為郢州刺史鎮義陽在州銳於聚斂又納賄於于忠徵為給事黃門侍郎

王雲為兗州刺史坐受所部荆山戍主桂受財貨又取官絹因染割易御史糾劾付廷尉遇赦免

寇臻為弘農太守坐受賂為御史所彈遂廢卒於家

寇治臻之子也為河州刺史在任數年城民詣都列其
貪狀十六條會赦免

崔康為廣平內史大納財貨為清論所鄙

鄭義為安東將軍西兗州刺史多有受納政以賄成性
又嗇恠民有禮餉者皆不與杯酒齷肉西門受羊酒東
門酤賣之以李冲之親法官不知糾義子懿為齊州刺
史好勸課善斷決雖不潔清義然後取百姓猶思之義
兄洞林為濮陽太守坐貪穢除名洞林兄子平城為東

平太守性清狂使酒為政貪殘平城子伯猷為南青州
刺史在州貪恠妻安豐王元延明女專為聚斂貨賄公
行潤及親戚戶口逃散邑落空虛乃誣陷良民云欲反
叛籍其資財盡以入己誅其丈夫妻女配沒百姓怨苦
聲聞四方為御史糾劾死罪數十條遇赦免因以頓廢
齊文襄王作相每誠厲朝士嘗以伯猷及崔叔仁為喻
鄭雲字道漢歷雁門濮陽二郡貪穢狼藉以納賄為事
劉騰為安州刺史坐選舉受財為御史所糾因暴病卒

趙超宗為汝南太守多所受納徙河東太守卒官超宗
長子叔隆為中山內史在郡無德政專以貨賄為事

薛道次為秦州刺史帶隴西太守後為滎陽太守遷肆
州刺史所在貪穢在州彌甚納賄於司空劉騰以求美
官未得而騰死

高雙為清河太守贖貨將刑在市遇赦免後為太尉史
俄出為涼州刺史專肆貪暴以罪免既納貨高肇復起
為幽州刺史又以貪穢被劾罪未判遇赦復仕未幾而

卒

李遷哲崇之子也崇性好財貨家資巨萬營求不息遷哲為相州刺史亦無清名鄴雜市廛收擅其利時論所鄙遷哲初至州斥逐細人遷徙佛寺逼買其地廣興第宅百姓患之崇北征之後徵兼太常卿御史高道穆毀發其罪過

張纂為樂陵太守在郡多所受納聞御史至棄郡逃走於是除名乃卒

傅敬和豎眼之子豎眼前為益州刺史朝廷以其父有遺惠復以敬和為益州聚斂無已好酒嗜色遠近失望崔延治為安北將軍并州刺史在州貪汙聞於遠近

李子貞為兗州刺史坐貪汙賜死

賈智為滄州刺史貪縱甚為民害

李洪之為秦益二州刺史洪之素非廉清每多受納時孝文始建祿制法禁嚴峻司察所聞無不窮糾遂鎖洪之赴京孝文臨太華庭集羣官有司奏洪之受贓狼藉

又以酷暴孝文親臨數之以其大臣聽在家自裁

高遵為齊州刺史選召寮吏多所取納又其妻胡氏家在齊州母弟舅甥共相憑屬爭求貨利嚴暴非理殺害甚多貪酷之響孝文頗聞之及車駕幸鄴遵自州來朝會有赦宥遵臨還州請辭帝於行宮引見諫讓之遵自陳無負帝厲聲曰若無遷都赦必無高遵矣又卿非惟貪恠又虐於刑法自謂何如齊陰王猶不免於法卿何人而為此行自今宜自謹約還州仍不悛革齊州人孟

僧振至雒訟遵詔廷尉少卿劉述窮鞫皆如所訴先沙
門道登過州遵以道登荷寵於帝多奉以貨深託仗之
道登屢因言次申咨救遵帝不省納遂詔述賜遵死時
遵子元榮請雒訟寃猶恃道登不時還赴道登知事決
方乃遣之

安樂王長樂為定州刺史多不奉法以貪暴徵詣京師
子銓宣武初為涼州刺史在州貪穢政以賄成

許彥自散騎常侍出為相州刺史在州受納多違法度

詔書切讓之然以彥腹心近臣弗之罪也

崔暹為南兖州刺史盜官瓦贓汙狼藉為御史中尉李平所糾免官後行豫州事尋即真坐遣子析戶分隸三縣廣占田宅藏匿官奴障愆陂葦侵盜公私為御史中尉王顯所彈免官

胡泥為定州刺史以刑罰酷濫受納貨賄徵還戮之

張赦提為幽州刺史頗縱妻段氏多有受納令僧尼因事通請貪虐流聞中散李真香出使幽州訪牧守政績

真香驗按其罪赦提懼死欲逃其妻姑為太尉東陽王
丕妻恃丕親貴自許詣丕申訴求助謂赦提曰當為訴
理幸得申雪願且寬憂不為異計赦提以此差自解慰
段乃陳列真香昔嘗因假而過幽州知赦提有好牛從
索不果今為臺使心脇前事故威逼部下考楚過極橫
以無辜證成誣罪執事恐有不盡使駕部令趙秦州重
往究訊事狀如前處赦提大辟孝文詔賜死於第

北齊元坦為冀州刺史專務聚斂每百姓納賦除正稅

外別先青絹五疋然後為受

王則為雒州刺史性貪恠在州取受非法舊京諸像毀以鑄錢茲時世號阿陽錢皆出其家後為徐州刺史取受狼藉鎖送晉陽文襄恕其罪

常山王演孫彥道為徐州刺史坐奪商人財物免官

段孝言為齊州刺史以贓賄為御史所劾遇赦免

爾朱渾元為并州刺史以貪汙劾特見原

斛律武都為梁兗二州刺史所在並無政績惟事聚斂

侵漁百姓

司馬消難為北豫州刺史鎮武牢消難博涉史傳有風神然不能廉潔在州為御史所劾

張保雒為滄州刺史封敷城郡王在州聚斂免官削奪王爵

任胄為東郡太守家本豐財又多聚斂動極豪華賓客往來將迎至厚尋以贓汙為有司所劾

庫狄伏連為鄭州刺史鄙恠愚狠無治民政術及居州

任專事聚斂

薛修義為齊州刺史以贖貨除名

堯傑為南兗州刺史多所取受然性果決吏民畏之

封延之為青州刺史好財利在州多所受納

盧勇為齊州刺史好財利多所受納後行梁州事除散騎常侍為夏陽太守段業告其在州聚斂被禁止送梁州窮治未竟遇疾卒於禁所

王紘為北豫州刺史所歷皆好聚斂然性和直吏民不

甚患之

韓軌為瀛州刺史在州聚斂為御史糾劾削除官爵

廣陽王深為鎮州刺史在州多所受納政以賄成私家
有馬千匹者必取百匹以此為常深子湛孝靜初為冀
州刺史所在聚斂風政不立

崔叔仁為潁州刺史以貪黷為御史所劾興和中賜死
於宅

崔季叔為齊州刺史坐遣人渡淮平市亦有贓賄事為

御史所劾會赦不問

隋靈貴為齊州刺史民饑穀米踊貴閉人糶而自糶之
坐是除名

張威為青州總管在州頗治產業遣家奴於民間鬻蘆
荻根其奴緣此侵擾百姓帝深加遣責坐廢於家

王仁恭為馬邑太守時天下大亂百姓饑餒道路隔絕
仁恭頗改舊節受納貨賄又不敢輒開倉廩賑恤百姓
唐席辨貞觀中為滄州刺史辨雖有幹畧而性貪鄙時

所部長蘆令李太辨恣行侵奪賄賂盈門按察既知屢
加誚讓太辨懼求媚於辨送縑二百疋羅三十疋以遺
之辨遂納之反加顧遇事發詔朝集便臨觀而戮之太
辨亦伏法

李敬業為眉州刺史中宗嗣聖元年坐賊貶授柳州司
馬

左感意為廓州刺史開元二年坐賊杖殺

張嘉貞開元初為定州刺史至州於恒嶽廟中立頌嘉

貞自為其文乃書於治其碑用白石為文素質黑文甚為奇麗先是嶽祠為遠近祈賽有錢百萬嘉貞自以為頌文之功納其數萬

蕭執珪為嵐州刺史盧季珣為復州刺史崔憬為銀州刺史開元八年並坐貶詔曰先王制法度立師長將以為理也夫刺史者受方岳之寄為吏人之表以宣法則以樹風教故得人則河潤九里京師蒙其福非才則虐流百城黎庶受其害所以漢宣云與我共理者其惟良

二千石歟中大夫前守嵐州刺史蕭執珪通議大夫前
守復州刺史盧季珣中散大夫前守銀州刺史崔憬等
各藉階資謬居藩牧不率法度情匪在公憑此尸素黷
其貨賄豈有奉條察之委居道化之先顛利無厭貪以
敗類固上行而下效豈澄源以正本有覲面目實虧風
憲雖罪無所漏已寘刑章而情頗難容宜從遠謫執珪
宜除名配隸營府即差使所在馳驛領送至彼不得東
西季珣可恩州司馬憬可施州司馬并員外置同正員

即發遣赴任仍頒於郡國以勵在官

崔較為河南尹開元八年貶代州都督受賄故也

李邕為陳州刺史開元十三年車駕東封迴邕於汴州
謁見獻詞賦甚稱旨頗自矜衍中書令張說甚惡之俄
而陳州賊濫事發下獄鞠訊罪當死許州人孔彰上書
救之請以身代邕罪疏奏會赦減死貶為欽州遵化縣
尉彰亦配嶺南

盧暉為魏州刺史開元二十九年坐賊詔云暉素為妄

庸幸承資地早升清列爰典大藩不能勵彼公心少申
答效而咨其鄙識莫顧庶隅黷貨無厭蠹政斯甚或增
加賦斂或減截官錢入己之贓六百餘貫自外所犯數
倍於茲况又役使人工殆三十萬復有何要輒化為勞
慢法徇私觸類非一朕志存撫育情切好生特寬斧鑕
之誅俾從流放之典可長流富州百姓與朕共理伊邇
列城自頃以來每加優異凡在遠近固合周知豈有受
恩而不盡節炤鑒若此咸宜勉之無或效尤自投於網

王琚為鄴郡太守天寶五載坐賊詔云琚久經任使歷典藩條恃朝廷之見寬冒憲法而無憚凡所蒞職罕著善聲自頃移官益彰喧訟志由貪敗政以賄成所犯賊私動盈千計正名論罪合真流刑宥過推恩猶從貶任可江華郡司馬員外置

劉巨鱗為南海太守充嶺南五府經畧採訪處置等使坐賊下獄死

李宓為雲南太守犯賊貶為灋陽郡慈利縣丞員外置

韋陟為河東太守天寶十三年貶為臨賀郡桂嶺縣尉
員外置仍馳驛發遣陟天寶初自吏部侍郎出為襄陽
鍾離義陽三郡太守楊國忠專政徵為河東太守本道
採訪使陟以名位素著怏怏久失職及臨闕輔冀有任
用而性頗侈豪所蒞不修清廉之操遂恣其利欲盛以
河東土物入饋權要為部人所發詔下御史訊鞫陟時
朝謁在華清宮惶怖不安乃厚遺御史中丞吉溫求救
於祿山事世為國忠奏貶溫亦坐貶澧州長史

李巨肅宗乾元初為河南尹於城市橋梁出入車牛皆
稅錢以供國用頗有乾沒士庶怨之後與妻張氏不睦
張氏即皇后從父妹宗正卿李遵構之發其贓貶為遂
州刺史

張萬頃為廣州刺史上元二年以贓貶巫州龍標縣尉
員外置長任

李鼎自鳳翔入為衛尉卿寶慶六年貶為思州長史員
外置坐贓也鼎守鳳翔以賄聞雖去職姦狀皆露既行

賜死於路

李佚為宣州刺史代宗永泰二年坐贓二十四萬集眾杖殺籍沒其家

黎幹大歷八年復拜京兆尹兼御史大夫幹自以為得志無心內理貪暴益甚徇於財色

薛邕為宣州刺史德宗建中初盜官貨計錢萬萬殿中侍御史員寓因私憾而奏舉之故貶官無幾又配流象

州

崔穆為黔中觀察使貞元十一年部人告穆賊二十七萬貫及他犯遣監察御史李直方往州覆按

劉贊貞元十二年為宣州刺史天下殷贍處也贊厚斂殖貨以務貢獻用求恩寵又不訓子弟童稚者便以驕傲為事

路愆為涪州刺史貞元十四年以賊追奪兩官仍勿齒
三五年

陽履為永州刺史貞元十六年觀察使呂渭奏履犯賊

令三司使推鞠履又表自言當州營備錢物上獻為觀
察使所鞠按令中使王文湊就州取履至京師三司使
訊其所妄破用履云市馬進訖及訊其馬於何人處買
及價直齒歲履答狀馬主東西南北貴公子也今不知
所在言馬齒歲按禮經齒路馬者當誅今不敢言其他
狀款多如此類德宗悅其進奉之言不責也但令免官
而已

鄭式瞻為衢州刺史貞元十七年死於州獄初鹽鐵使

李錡於衢州即山鑿銀式贍誣銀工杖殺十餘人人怨之觀察使舉奏發御史就鞠之坐贓二千貫笞四十流崖州詔未至而死

張登為漳州刺史貞元十七年死於州獄登暴狠貪冒擅賦百姓沒買州人為奴婢者三十人姦亂裨將家財非一其不堪辱有縊死者部人蔡化訴於闕下詔命就鞠遂幽死

陳審為明州刺史貞元十九年坐贓配流崖州

臧渙為韶州刺史元和四年以賄聞貶賀州司馬

王仲周為明州刺史元和四年坐贓貶韶州司戶

劉文翼為瀘州刺史元和四年坐贓貶為崖州登邁縣尉

陳當為榮州刺史元和五年貶為羅州吳川縣尉以坐贓故也

張慙為將作少監元和五年貶為朗州長史慙前為蘄州刺史坐贓為觀察使郝士美所奏

李少和前為江西觀察使元和七年勅曰李少和職奉
察廉迹乖周慎除替已後猶取公錢或交換未填或轉
移私費今除已填納贓數外尚欠三千七百餘貫身已
淪沒不可徵收宜放免

李宙為丹王府長史元和七年以前任復州刺史坐贓
貶為賀州司戶參軍

孟嘗謙為安州刺史元和八年坐在郡貪濁弋獵擾人
貶柳州司馬

李將順為袁州刺史元和九年坐以官錢貿易以求利且擅興工役貶循州司戶參軍

李彥輔為簡州刺史元和十年坐贓貶韶州司馬

龐說為忠州刺史元和十年貶為端州司戶說嘗改易其州庫門以內向用便迴貨故及貶

馬平陽為憂州刺史元和十年以貪虐貶為韶州司戶夏侯至為汴州刺史元和十年以貪虐貶潮州司戶

李逢為台州刺史元和十二年坐贓貶康州司戶參軍

啖異為集州刺史元和十二年坐賊貶封州司戶參軍
崔祝為鄭州刺史元和十二年御史臺奏祝坐賊三萬
餘貫勅崔祝抵犯刑章宜加貶逐緣其身居憂服未可
授官宜且於康州安置待服滿日處分其賊充進助者
仍令度支收管本道觀察使覺察不早特宜釋放祝於
當州顧召行營車除充佑給付又擅出州倉粟麥貴貨
之以利入己及觀察使舉聞發御史按之乃以助軍進
奉為名晝夜促進祝父老病聞御史按祝竟以憂死祝

既除名所至遲留又錮身配流康州

第五申為資州刺史元和十四年坐賊貶連州司馬

崔勵為邛州刺史元和十四年坐賊決杖流驩州

宋君平為涪州刺史元和十五年坐賊削官一任

楊朗為鄭州刺史元和十五年坐賊削官一任徵十斤

銅

唐慶前為壽州刺史長慶四年刺史楊歸厚告論慶違
赦勅科配百姓稅錢及破用官庫錢物等事慶犯正入

已贓四千七百餘貫勅唐慶入已贓僅五千貫據罪定刑實難全宥但以惟新之日政務從寬要示含容俾從流竄宜除名長流崖州

李彤自鄧州刺史入為司農少卿長慶四年貶吉州司馬員外同正彤前在鄧州坐贓錢百餘萬仍自刻石紀功號為善政碑觀察使柳公綽以事聞故有是命

元稹以穆宗長慶中為浙東觀察使既放意娛游稍不修邊幅以贖貨聞於時

梁張思慎為蔡州刺史以貪貨大失民情

後唐李存儒為衛州刺史為梁將段凝所陷存儒控御無術誅斂州民防城之卒皆徵月課縱其歸去段凝知其若此夜渡舟師詰旦登城存儒不之覺

李鄴為亳州刺史明宗天成二年詔配崖州長流百姓所在賜自盡鄴為政貪汙有奴為人轉金冀迴公道奴匿其金鄴知遂殺之其家人上論訴其私事遂伏法

成景宏為曹州刺史受倉吏百緡天成三年七月勅成

景宏位列百城秩膺八命在旌旃而甚至於委任以非
輕所宜均我詔條副余優寄而乃罔遵彝憲輒恣貪求
差廩吏以非公取貨財而潤己纔行鞠勘果伏罪尤宜
行竄逐之文以示澄清之道可貶綏州司戶參軍續勅
長流宥州

韓知章為漢州刺史天成四年以在任日恣誅求達於
聖聰勒歸私第

盧質為滄州節度使長興四年奏薦滄景觀察判官靳

詡雪得寃獄乞行恩獎詡父名儒滄州市井之富民也
家財鉅萬前後鎮帥無不受其賂者先是應聖節斬儒
來朝帝見之於後樓下儒因言其子詡為本道觀察判
官月限已滿乞量留一年帝即從之又薦押牙郝寓帝
曰寓乃何人朝廷事有大臣朕不自由爾無宜多言也
詡商販之子不數年至本州從事質書生備位廉察而
受賂薦許人士醜之

晉李彥珣為坊州刺史高祖天福五年十二月犯枉法

賊特勅免官彥珣久臨翟道苛暴不法結怨所部宜君
縣民唐璘與李婦爭田彥珣納賄數十萬曲斷其事故
李婦詣御史府上訴按詰伏罪法寺詳斷以上奏勅曰
李彥珣頃委分符不能求瘼既受賂而枉法合准律以
定刑特與含弘聊示懲戒宜奪一任官送虢州收管
周安審信歷許兗二鎮所至以聚斂為務民甚苦之
葉仁魯為萊州刺史貪暴特甚吏民不勝其苦受代日
遁離本州及為部民所訟下獄鞠之仁魯伏罪賊汙狼

籍

趙鳳為單州刺史以進奉南郊為名率斂部民財貨為人所訟

張順為楚州刺史顯德五年十二月己丑賜死於都城外順發身戎伍累遷虎捷廂主歷登汝楚三州防禦使在楚州日嘗隱落下碇稅錢五十餘萬官庫絲綿二千餘兩及縱其部下侵民民甚苦之為轉運判官馮瓚所奏下御史府訊之得實故寘於法焉

冊府元龜卷七百

欽定四庫全書

冊府元龜卷七百一

宋王欽若等撰

令長部

總序

古者列爵惟五分土惟三文軌所通諸侯而已縣道之制蓋未聞焉周初小司徒之職都鄙之制四甸為縣方一十里周書千里百縣其名雖肇其地尚小東周之末諸侯強大封內之縣制始盛矣掌其政者魯謂之宰仲

尼為中都宰是也齊謂之大夫齊威王封即墨大夫烹
阿大夫是也楚謂之尹沈尹成為方城之外縣尹是也
亦謂之公葉公諸梁是也秦氏罷侯置守以郡統縣其
制萬戶已上置令秩千石至六百石減萬戶置長秩五
百石至三百石所職治民顯善勸義禁姦罰惡理訟平
賦恤民時務秋冬集課上計於所屬郡國其列侯所食
者為國國置相所掌如令長皇太后皇后公主所食曰
邑有蠻夷曰道皆置令長漢因之秩六百石以上皆銅

印墨綬三百石銅印黃綬成帝綏和初又詔長相皆墨
綬哀帝建平中復黃綬後漢自千石今至四百石長皆
墨綬哀帝三采青赤紺淳青質長丈六尺八十首其屬
官丞一人署文書典知倉獄大縣尉二人小縣一人主
盜賊各置諸曹掾有廷掾勸農掾制度掾之類其餘大
約如郡員丞尉秩四百石至二百石名為長吏計食佐
史百石以下名為小吏統內五家為伍十家為什百家
為里里有魁以相簡察十里為亭亭置長以禁盜賊十

亭為鄉鄉置有秩三老嗇夫凡五千戶置有秩秩百石
小者置嗇夫皆主知民善惡為役先後知民貧富為賦
多少三老掌教化凡孝子順孫貞女義婦讓財救患及
學士為民法式者皆表其門以興善行游徼掌徼循禁
司姦盜又有鄉佐主收賦稅丞尉而下並兩漢之通制
也後漢以雒邑京邑所治屬官差多故丞有三人馬魏
循漢制晉千戶以上及州治下皆置令減此置長並銅
印墨綬朝服進賢一梁冠雒陽置六部尉大縣二尉次

縣一尉小縣一尉又有主簿錄事史主記室史門下書
佐幹游徵議生循行功曹史小史廷掾功曹史小史書
佐幹法門曹幹金倉賦曹掾兵曹史吏曹史獄小吏獄
門亭長都亭賊捕掾等戶不滿三百以下職吏十八人
散吏四人三百以上職吏二十八人散吏六人五百以
上職吏四十人散吏八人千以上職吏五十三人散吏
一十二人千五百以上職吏六十八人散吏一十八人
三千以上職吏八十八人散吏二十六人鄴及長安置

吏得同三千戶之制又縣戶百五已上置鄉三千已上
置二鄉五千已上置三鄉萬已上置四鄉鄉置耆夫一
人千戶已上置治書史一人千戶以上置史佐各一人
正一人千五百已上置史一人佐二人又統內百戶置
里吏一人千戶以上置較官掾一人又皆置方畧吏四
人宋齊已後多如晉制縣令秩千石者銅印環劔墨綬
朝服進賢冠兩梁餘並一梁亦有帶雜號將軍而為之
者亦有以臺省而帶之者後魏縣置三令長為封國者

置相雒陽令其品從五上縣令相其品六中縣令相其品七下縣令相其品七下孝文初制縣令能靜一縣劫盜者兼治二縣即食其祿能靜二縣者兼治三縣三年遷為郡守太和中復次職令其祿甚厚京官清貧者或帶縣令以優之其後用人益雜但選勤舊令史為之而搢紳耻居焉北齊制縣自上上至下下凡九等之差上上上中縣其品並從五鄴臨漳成安三縣同之上下縣其品六中上中中下其品從六下上縣其品七下中

下下縣其品從七然用人尚濫武成帝搜揚世胄子弟
總名集神武門宣旨慰諭而授之自是始用士人凡上
縣有丞尉先迎功曹先迎主簿功曹主簿錄事及兩曹
戶曹金曹租曹兵曹等掾市長等員合五十四人上中
上下縣遞減五人中上縣減六人中中縣減五人中下
至下下縣遞減一人各置白直以供役鄴臨漳成安三
縣其員差多鄴又領右部西部三尉凡一百三十五里
臨漳又領左部東部二尉凡一百一十四里成安又領

後部北部二尉凡七十四里各置正後周長安萬年
縣令正五命七千戶以上令亦同之四千戶以上縣令
正四命二千戶以上令四命五百戶以上令正三命戶
百以下令三命隨增大興長安河東雒陽四縣令為正
五品諸縣以閒劇衝要為等級屬官改尉為正唐制有
赤縣畿縣望縣緊縣上縣中縣中下縣下縣之差赤令
其品正五畿令其品正六上縣令其品從六望緊同之
中縣令其品正七下縣令其品從七其後又有次赤次

畿之名後魏已後冠服並隨其品焉亦有假臺省官以榮之者屬官置錄事司功司倉司兵司司法司士畧如周制丞為副貳如州上佐主簿檢轄如州錄事參軍尉分治諸曹如州判司統內百戶為里里置正五里為鄉置耆老亦曰父老五代因之夫一同之地有社稷焉有吏民焉可以事神可以為政有督責之令有刑罰之威勸課以率下貢賦以奉上蓋生民舒慘之所屬國家休戚之所同至于丞尉而下皆亦攸助其治居其任者可不

重乎今故銓次其善惡之迹以為後世之戒焉凡二十
一門

選任

褒異

公正

選任

令長參五等之列布一同之政苟非選任曷補風化所以
以蘊幹才而有聲因篤行而辟名若非務其幹蠱守以
廉勤恕察民情精深理道則曷能與於此哉故曰正理
之本必在于親人親人之官莫切于令長斯之謂矣

漢嚴延年任侍御史坐法致死亡命會赦出丞相御史府徵書同日到延年以御史書先至詣御史府復為掾

宣帝識之

識其前劾霍光擅廢立

拜為平陵令

尹賞為粟邑令左馮翊薛宣奏賞能治劇徙為潁陽令後以御史舉為鄭令成帝永始元年延間長安中姦猾

浸多閭里少年羣輩殺吏受賕報仇

或有自怨于吏或受人賄賂為仇讐

也相與探丸彈

為彈丸作赤黑白三色而共探取之也

得赤丸者斫武吏

得黑者斫文吏白者主治喪

其黨與有為吏及他人所殺者則主其喪事也城

中薄暮塵起剽劫行者死傷橫道枹鼓不絕枹擊鼓賞

以三輔高第選守長安令得一切便宜從事

後漢吳祐以光祿四行遷膠東侯相

漢官儀曰四行敦厚質樸遜讓節儉

韓韶辟司徒府時太山賊公孫舉偽號歷年守令不能
破散多為坐法尚書選三府掾能理劇者乃以韶為羸
長賊聞其賢相戒不入羸境

魏何夔為太祖司空掾屬時東南多變太祖以東郡為
鄴令夔為城父令諸縣皆用名士以鎮撫之其後吏民

稍定

鄭揮字文公避難淮南太祖聞其篤行召為邵陵令

蜀鄧芝字伯苗先主定益州為郫邸閣督先主出至郫
與語大奇之擢為郫令

南齊沈憲為左軍司馬太祖以山陰戶衆難治欲分為
兩縣武帝啓曰縣豈不可治但用不得其人耳乃以憲
帶山陰令治聲大著孔稚珪請假東歸謂人曰沈令料
事持有天才

傅琰初為山陰令有能名及為江夏王錄事參軍太祖
輔政以山陰獄訟煩積復以琰為山陰令

陳沈君高為廷尉卿宣帝太建元年東境大水百姓饑
敝乃以君高為貞威將軍吳令

蕭弘為中庶子以疾去官明年京師多盜乃復起為貞
威將軍建康令

褚玠為中書侍郎太建中山陰縣多豪猾前後令皆以
贓汙免宣帝患之謂中書舍人蔡景歷曰稽陰大邑久

無其宰卿文士之內試思其人景厯進曰褚玠廉儉有
幹用未審堪其選不帝曰甚善卿言與朕意同乃除戎
昭將軍山陰令

北齊路去病為殿中侍御史以正直知名時敕用土人
為縣宰以去病為定州饒陽令

後周辛昂為龍州長史領龍安郡時事成都一方之會
風俗舛雜尉遲迥平蜀以昂達於從政表昂行成都令
唐權懷恩高宗時為尚乘奉御有奉乘安畢羅善于調

馬帝頗狎之懷恩因奏事遇畢羅在帝左右言戲無禮
懷恩既退執而杖之帝知而嗟賞謂侍臣曰懷恩乃能
不避強禦真良吏也即日擢為萬年縣令

竇申德宗時為司勳員外郎貞元二年正月詔曰政理
之本必在於親人親人之官莫切于長令臺郎御史選
重當時得以分朕之憂司勳員外郎竇申等十人咸以
器能精深理道輟於周行往涖通邑申可長安縣令鄭
珣瑜檢校吏部員外郎魚奉先縣令常武檢校禮部員

外郎兼昭應縣令賈全咸陽縣令兼監察御史韋貞伯
藍田縣令兼監察御史崔淙以原縣令兼侍御史王倉
檢校比部員外郎兼美原縣令李曾蓋屋縣令兼監察
御史李鯤富平縣令兼殿中侍御史

韋夏卿為刑部員外郎時久旱詔于郎官中選畿赤令
繇是改奉天縣令

馮伉貞元中為膳部員外郎澤潞節度使李抱真卒充
弔贈使抱真男遺伉帛數百疋不納又專送至京伉因

表奏固請不受屬醴泉闕縣令宰臣進人名德宗意不
可謂宰臣曰前使澤潞不受財帛者此人必有清政可
以授之遂改醴泉縣令

梁季文矩為司門郎中太祖開平元年六月以文矩為
開之縣令司勳員外郎孫拙為浚儀縣令先是二邑皆
吏部注授今昇為赤縣故命二省郎理

褒異

夫賞有功褒有德帝王之彛典也古者子男之任實列

于諸侯宰字之官或選于郎署蓋民政之攸係而教化之所出也西漢而下暨夫五代乃有知識深遠材用周敏潔身以馳譽勤職而集事布優異之政著殊尤之績獄訟稀簡寇盜衰息以至濟危窘而有備制彊禦而不懾力勸乎耕稼誕宣其條教由是增之爵秩進諸章綬或降彼恩詔臨問其勤勞或載在冊書激勸乎羣萃或寵之蕃錫或賜之嘉名斯皆薰灼其聲猷便蕃其崇獎咸用編次式垂于後

漢王尊行美陽令事宣帝行幸雍過虢尊供張如法而

辦尊雖行美陽令而就虢供張也

以高第擢為安定太守

後漢卓茂前漢末為密令有異政光武即位下詔褒之拜太傅封褒德侯

歐陽歛為原武令光武初平河北到原武見歛在縣修政遷河南都尉

孔奮建武初守姑臧長光武詔書以為治有絕迹賜爵關內侯

董宣為雒陽令卒于官光武詔遣使者臨視惟見布被覆尸妻子對哭有麥數斛敝車一乘帝傷之曰董宣廉潔死乃知之帝以宣嘗為二千石賜文綏葬以大夫禮拜子並為郎中

馮魴遷邾令光武車駕西征隗囂潁州盜賊羣起邾賊延褒等衆三千餘人攻圍縣舍魴率吏士七十許人力戰連日弩矢盡城陷魴乃遁皇帝聞其反即馳赴潁川魴詣行在所帝案行闔處知魴力戰乃嘉之曰此健全

也

祭彤為襄贛令時賊鈔掠到官誅鉏姦猾縣界清靜詔書增秩一等賜鱸百疋

寒朗為濟陽令以母喪去官百姓追思之章帝東巡狩過濟陽三老吏人上陳朗前政狀帝至梁見朗詔三府為辟首由是辟司徒府

魯恭為中牟令有異政河南尹袁安上書言狀章帝異之會詔百官舉賢良方正恭薦中牟名士王方帝即徵

方詣公車禮之與公卿所舉同恭在事三年州舉尤異
後拜侍御史

魯丕恭之弟也為新野令州課第一擢拜青州刺史

陳重為細陽令舉尤異遷會稽太守

臧旻為盧奴令冀州舉尤異遷揚州刺史

童恢為不其令青州舉尤異遷丹陽太守

魏楊沛漢末為新鄭長太祖為兗州刺史西迎天子所
將千餘人皆無糧沛進乾菹太祖喜後太祖以為鄴令

已拜太祖見之問曰以何治鄴沛曰竭盡心力奉宣科法太祖善之顧謂坐席曰諸君皆可畏也賜其生口十人絹百疋既欲以勵之且以報乾槩也

崔林河東武城人太祖定冀州召除鄆長冀無車馬單步之官太祖征壺關問長吏德政最者并州刺史張陟以林對于是擢為冀州主簿

吳張純字元基補廣德令治有異績擢為太子輔義都

尉

晉郤正初仕蜀為祕書郎入晉除安縣令武帝泰始八年詔曰正昔在成都顛沛守義不違忠節及見受用盡心幹事有治理之績以正為巴西太守

竇允為謁者泰始中詔曰當官者能潔身修已然後在公之節乃全身善有章雖賤必賞此興化立教之務也謁者竇允前為浩長以修勤清白見稱河右是當擢用使立行者有所勸王者詳復叅訪有以旌表之拜臨水

令

夏謨為鄴令卒咸寧元年以謨有清稱賜穀百斛

宋劉真道為錢塘令文帝元嘉十三年東饑帝遣揚州
治中從事史沈演之巡行在所演之上表薦真道政績
為治民之良宰帝嘉之賜穀千斛以真道為步兵校尉
江秉之為山陰令以在縣有能遷補新安太守

梁何遠為武康令勵廉節正身率職民甚稱之高祖聞
其能擢為宣城太守自縣為近畿大郡近代未之有也
陳褚玠為山陰令縣民張次的王休達等與諸猾吏賄

賂通姦全丁大戶類多隱沒玠乃鎖次的等以其狀啓
臺宣帝手勅慰勞

北齊薛琚初仕後魏為雒陽令孝明時京師久旱悉召
集華林理問惟雒陽獄有三人帝嘉之賜絹百疋

後周路去病初仕北齊為饒陽令有能名武帝平齊重
其能官陰郡守公孫景茂二人不被替代發詔褒揚

隋房恭懿高祖開皇初吏部尚書蘇威薦為新豐令政
為三輔之最時雍諸縣令每朔謁帝見恭懿必呼至榻

前訪以理人之術蘇重薦之起授澤州司馬

劉曠為臨潁令清名善政為天下第一尚書左僕射高
頴言其狀高祖名之及引見勞之曰天下縣令固多矣
卿能獨異于衆良足美也顧謂侍臣曰若不殊獎何以
勸于天下優詔擢拜黃州刺史

郭絢為漆縣丞煬帝問絢言蘇威天下清名第一者誰
威以絢對帝賜絢帛百疋令朝集使送至郡郊以旌異
焉

唐李太亮高祖武德初為土門令勸以墾闢歲因大稔時太宗居藩撫巡北境聞而嘉之賜馬一疋帛五十段王甫武德初年為醴泉縣令有善政賜帛五十段賈敦實為饒陽令政化清淨老幼懷之時兄敦頤復授瀛州刺史舊制大功已上不復連官朝廷以其兄弟在職俱有能名遂不遷替

韋崇德為葉縣令高宗咸亨二年冬幸許汝等州詔賜崇德絹百疋表清節也

鄧玄挺為頓丘令為縣有異政璽書勞問

馮元淑為清漳令政有殊績又歷浚儀始平二縣令中宗時降璽書勞勉仍令史官編其事跡

李朝隱為長安令有宦官內寺伯干以非法朝隱正色叱之仍繫于獄睿宗下制褒之曰夫不吐剛而諂上不茹柔而躡下者君子之事也踐雷必繩登車無屈者正人之務也中大夫行長安縣令李朝隱見義不回強直自遂亟聞佳政累著能名近者中官入官有干儀式遂

能責之以禮繩之以德但官豎之流多有憑恃柔寬之
代必弄威權每觀載籍嘗為嘆息朕規戒前古勤求典
憲能副朕意實在斯人虞延持皇后之客梅陶鞭太子
之傳古稱遺直復見于今思欲旌其美行遷以重職為
時當閱戶政在養人宜加一階用表剛烈

劉思穆為深州饒陽縣令崔懷寔為冀州信都縣令玄
宗開元三年並以課績居最各賜物三十疋勅有司待
秩滿日優與處分

唐昇為河東縣令代宗大曆七年褒昇階至朝散大夫
更留三年旌善政也

韋滌為涇陽令德宗貞元二年正月詔曰滌有禦災之
術有字物之方人不流亡事皆辦集惟是一邑之內獨
無愁怨之聲古之循良何以邁此可檢校工部員外郎
兼本官賜緋魚袋并賜衣一襲絹一百疋馬一匹凡百
君子各宜自勉

鄭珣瑜為奉先令韋武為昭應令崔琮為華元令韋貞

伯為藍田令李曾為藍屋令貞元三年五月詔以珣瑜為饒州刺史武為遂州刺史琮為歙州刺史貞伯為舒州刺史曾為郢州刺史錄善政也各賜馬一匹并綵物衣服以遣之

王正雅為萬年縣令當穆宗時京邑號為難理正雅抑強扶弱政甚有聲會柳公綽為京兆尹於帝前褒稱帝命以緋衣銀章就縣宣賜遷戶部郎中

梁劉羣為長子令開平二年三月太祖在澤州羣率人

戶來見且言久在山谷保護親族每與軍前潛探報蕃賊行止時亦供餽芻粟遞相告報帝嘉其忠節乃賜羣章服百姓賑而遣之

李濟美為開封令薛昭文為浚儀令乾化二年開封尹以其課最來上請未除替勅曰李濟美等宰邑浩穰有及物之政朕甚嘉之宜量留一年

後唐王延禧攝湯陰縣令柳承翰攝主簿明宗天成元年八月並賜緋魚袋以帝赴難時經過供頓之勞也

李溫美為博州武水縣令廢帝清泰二年縣民郭贊而
下再經州將陳狀乞奏留之觀察使言溫美公廉無濫
賦于民實為良吏詔曰州縣量留已有規制李溫美賜
緋魚袋

晉趙賚為壽長令高祖天祐四年七月詔考滿之外量
留三年飛蝗避境故也

漢劉繼儒晉末為晉陽縣令兼昌陵臺令開運三年詔
曰興王舊地原廟所存載懷瞻奉之心允屬循良之吏

以爾蒞官有政晉人美之假其省銜許留周歲更圖盡
瘁以稱陟明可檢校工部員外郎仍量留一年從北京
奏故也

周劉表徵為新安令太祖廣順元年遷河東府司錄參
軍獎能吏也

公正

古者子男居五等之列令宰為百里之長人民社稷之
攸繫政教威令之所出故名器斯重選任非易歷代而

下惟賢是圖乃有稟剛方之性勵貞固之操中立不倚當官而行拒非理之求絕諂上之迹謹守科法靡顧彊禦惟公是徇惟弊是革以至矯偷薄之俗弃印綬而去者咸足多尚者已

齊晏嬰字平仲治東阿三年景公召而數之曰吾以子為可而使子治東阿今子治而亂子退而自察也寡人將加大誅乎晏子曰臣請改道易行而治東阿三年不治臣請死之景公許之于是明年上計景公迎而賀之

曰善矣子之治東阿也晏子對曰前臣之治東阿屬託不行貨賂不至陂池之魚以利貧民當此之時民無饑者而君反以罪今臣之治東阿也屬託行貨賂至事左右陂池之魚入權家民之饑者過半君反迎而賀臣臣願乞骸骨公乃下席而謝曰子強復治之東阿者子之東阿也人無復與焉

後漢虞延少為戶牖亭長時王莽貴人魏氏賓客放縱延率吏卒突入其家捕之以此見怨故位不升

陳球為繁陽令時魏郡太守諷縣求納貨賄球不與之太守怒而撻督郵欲令逐球督郵不肯

袁安初為縣功曹奉檄詣從事因安致書于令安曰公事自有郵驛私情則非功曹所持辭不肯受從事懼然而止

趙儼為朗陵長陽安太守李通妻伯父犯法儼收治致之大辟是時殺生之柄決于牧守通妻子號泣以請其命通曰方與曹公戮力義不以私廢公嘉儼執憲不阿

與為親交

武周為下邳令時徐州刺史沛國公臧霸敬異周身詣
令舍部從事諛調不法周得其罪便收考竟霸益以善

周

周規為臨湘令長沙太守程徐二月行縣敕諸縣治道
規以方春向農民多劇務不欲奪人良時徐出督郵責
規即委官而去徐慙然有愧色遣功曹齋印綬檄書謝
請還歸規謂功曹曰程府君愛馬蹄不重民力徑逝不

顧

魏滿寵漢末為許令故太尉楊彪收付縣獄尚書令荀
或少府孔融等並屬寵但當受詞勿加考掠寵一無所
報考訊如法數日求見太祖言之曰楊彪考訊無他詞
語當殺者宜先彰其罪此人有名海內若罪不明必大
失民望竊為明公惜之太祖即日赦出彪初或融聞考
掠彪皆怒及因此得了更善寵

司馬芝為廣平令征虜將軍劉勳貴寵驕豪又芝故郡

將賓客子弟在界數犯法勲與芝書不著姓名而多所屬託芝不報其書一皆如法後勲以不軌誅交關者皆獲罪而芝以此見稱

吳陶謙為舒令郡太守張磐同郡先輩與謙父友謙耻為之屈當舞屬謙謙不為起固強之乃舞舞入不轉磐曰不當轉耶曰不可轉轉則勝人

晉李密為温令而憎疾從事嘗與人書曰慶父不死魯難未已從事白其書司隸司隸以密在縣清慎弗之劾

也密政化嚴明中山諸王每過溫縣必賫求供給溫吏
民患之及密至中山王過縣欲求芻艾薪蒸密牋引高
祖過沛賓禮老幼桑梓之供一無煩擾伏惟明王孝思
惟則動識先戒本國望風式歌且舞誅求之辟所未聞
命自後諸王過不敢有煩隴西圭司馬子舒深敬友密
而貴勢之家憚其公正

前秦徐嵩為長安令貴戚子弟犯法者嵩一皆考竟請
託路絕苻堅甚竒之謂其叔父咸曰人為長吏故當應

耳此年少落落有端貳之才

南齊孔道為陽羨長義興太守王績輒錄郡吏陳伯喜
付陽羨獄欲殺之道不知何罪不受績教為有司所奏
績坐白衣領職

梁顧憲之初仕宋為建康令至于權要請託長吏貪殘
據法直繩無所阿縱

羅研為信安令故事置勸農謁者圍桑度田勞擾百姓
研請除其弊從之

隋劉行本為太子左庶子以本官領大興令權貴憚其方直無敢至門者由是請託路絕法令清簡吏民懷之唐李義琰為太原尉時李勣為并州都督僚吏皆望風懼伏羲琰獨挺持曲直勣甚禮之

李元素為武德令時州將李文暎將調率金銀造嘗滿罇以獻百姓甚弊之而官吏無敢異議者元素抗詞固執文暎乃損其制度以家財營之

楊瑒為麟遊令時御史大夫竇懷貞檢校造金仙玉仙

二觀移牒近縣徵百姓所隱逆人資財以充觀用瑒拒而不受懷貞怒曰焉有縣令卑徵敢拒大夫之命乎瑒曰所論為人寬抑不知計位高卑貞壯其對遂寢其事又中宗時韋庶人上表請以年二十二為丁限及韋氏敗省司舉徵租調瑒執曰韋庶人臨朝當國制書非一或進階卿士或赦宥罪人何獨于已役中男重徵丁課恐非保人之術省司遂依瑒所執一切免之

薛訥為藍田令有富商倪氏于御史臺理其私債中丞

來俊臣受其貨財斷取義倉粟數千石以給之訥曰義倉本備水旱以為儲蓄安敢絕衆人之命以資一家之產竟執之不與會俊臣得罪其事遂寢

後唐羅貫為河南縣令貫為人強直正身奉法不避權豪時宦官伶人用事凡請託于貫者其書盈閣一無所報皆以示郭崇韜崇韜因奏其事由是左右每言貫之失

冊府元龜卷七百一

欽定四庫全書

冊府元龜卷七百二

宋 王欽若等 撰

令長部

能政

遺愛

課最

能政

夫建縣邑置令長有社稷焉有人民焉政之所由出也
歷代而下曷嘗不推擇而授任故其宣美績流淑聲者
亦不乏其人焉或明以炤姦或智能治劇或推之以恩

信或鎮之以清靜或兼文武之用或適寬猛之宜而史氏之述曰其民稱之懷之詠歌之不欺之畏而愛之雖為政不同歸于能矣

孔子為中都宰一年四方皆則之

宓不齊字子賤治單父其民附孔子曰告丘之所以治之者對曰不齊發倉廩賑窮補不足孔子曰是小附耳未也對曰當有能招賢才退不肖孔子曰是士附耳未也對曰所父事者三人所兄事者五人所友事者十有

二人所師者一人孔子曰所父事者三人所兄事者五人足以教弟矣所友者十有二人足以達壅蔽矣所師者一人足以慮無遺策舉無敗功矣惜乎不齊為之大功乃與堯舜參詩曰愷悌君子民之父母子賤其似之

矣

呂氏春秋曰宓子賤治單父彈鳴琴身不下堂而單父治巫馬期以星出以星入日夜不居以身親之而

單父亦治巫馬期問其故于宓子賤子賤曰我之謂任人子之謂任力任力者固勞任人者固逸子賤君子矣逸四支平耳目而百官以治義矣任其教而已矣

子奇年十八齊君使之化阿至阿鑄其庫兵以為耕器

出倉廩以賑貧窮阿縣大化

西門豹魏文侯時為鄴令河內稱治名聞天下

子產治
鄭民不

能欺子賤治單父民不忍欺西門豹治鄴民不
敢欺三子之才能誰最賢哉辨治者當能別之

漢朱邑字仲卿廬江舒人少時為舒桐鄉嗇夫廩平不

苛以愛利為行

仁愛于人
而安利也

未嘗笞辱人存問耆老孤寡

遇之有恩所部吏民愛敬焉

名信臣字翰卿九江壽春人以明經甲科為郎出補穀

陽長舉高第遷上蔡長其治視民如子所居見稱述超

為零陵太守

後漢公孫述字子陽扶風茂陵人哀帝時以父任為郎
後父仁為河南郡尉而述補清水長仁以述年少遣門
下掾隨之官月餘掾辭歸白仁曰述非待教者也

卓茂為密令勞心諄諄視人如子舉善而教口無惡言
吏民親愛而不忍欺之

歐陽歛為原武令世祖平河北到原武見歛在縣修政
遷河南都尉

班彪察司徒廉

察舉也司徒薦為廉

為望都長吏民愛之

耿國歷頓丘陽翟上蔡令所在吏人稱之

李咸為高密令政多奇異青州表其狀

劉平彭城人為郡吏守菑丘長政教大行其後每屬縣

有劇賊輒令平守之所至皆理由是一郡稱其能後為

全椒長政有恩惠百姓懷感人或增貲就賦或減年從

役刺史太守行部獄無繫囚人自以得所不知所問惟

班詔書而去

魯王興光武兄子試守緄氏令有明畧善聽訟甚得名
稱

法雄為平氏長善政事吏人畏愛之南陽太守鮑得上
其理狀遷充陵令

滕撫為涿令有文武才用太守以其能委任郡職兼六
縣風政修明流愛于人在事七年道不拾遺

劉駒駱為涇陽長政化大行道不拾遺

韋義為廣都長甘陵陳二縣令政甚有績官曹無事

獄空虛

陸康為高城令縣在邊陲舊制令戶一人具弓弩以備不虞不得行來

行來猶往來也

長史新到輒發民繕修城郭康

至皆罷遣百姓大悅以恩信為治寇賊亦息州縣表上

其狀

和拂為宛令時南陽縣郡吏因休沐游市里為百姓所患拂出逢之必下車公謁以愧其心自是莫敢出者政有能名

第五訪補新都令政平化行三年之間鄰縣歸之戶口
十倍

趙苞為廣陵令視事三年政教清明郡表其狀遷遼西
太守

葛龔為湯陰令又為臨汾令居二縣皆有稱績

王渙為雒陽令以平正居身得寬猛之宜

任浚為劇令

劇縣名屬
北海郡

初雒陽令王渙卒後連詔三公

時選皆不稱職順帝永和中以浚補之浚擢用文武吏

皆盡其能一歲斷獄不過數十

衛颯辟大司徒鄧禹府舉能按劇除侍御史襄城令政
有名績

童翊舉孝廉除須昌長化有異政吏人生為立碑

宋登為汝陰令為政明能號稱神父

桓鸞為己吾汲二縣令甚有名迹諸公並薦

劉洪為曲成侯相政教清均吏民愛而畏之為州郡之
所禮異也

崔瑗為汲令在事數言便宜視事一年百姓歌之

袁安歷陰平長任城令所在吏人畏而愛之

荀淑為朗陵侯相號稱神君

劉虞為博平令治政推平高尚純樸境內無盜賊災害不生

魏梁習漢末為漳長累轉乘氏海西下邳令所在有治
崔林河東武成人太祖定冀州名除鄔長無車馬單步
之官太祖征壺關問長吏德政最者并州刺史張陟以

林對于是擢為冀州主簿徙署別駕丞相掾屬

倉慈字孝仁黃初末為長安令清約有方吏民畏而愛之
吉茂字叔暢舉茂才除臨汾令在官清靜吏民不忍欺
蜀呂乂為新都綿竹令乃心隱卹百姓稱之為一州諸
城之首

晉曹攄為雒陽令仁惠明斷百姓懷之

喬智明少以德行聞成都王穎表為殄寇將軍隆慮共
二縣令二縣愛之號為神君

竇允始平人出自寒門清尚自修少仕縣稍遷郡主簿
察孝廉除浩豐長勤于為政勸課田蠶平均調役百姓
賴之為臨水令克己勵俗改修政事士庶悅服咸歌詠
之

潘京歷巴丘卻陵泉陵三令京明于政術路不拾遺

陸雲為浚儀令縣居都會之要名為難理雲到官肅然
下不能欺市無二價

宋傅僧祐有吏才再為山陰令甚有能名末世令長莫

及

江秉之為烏程令以善政著名東土徵為建康令為治
嚴察京邑肅然後為山陰令民戶三萬政事煩擾訟訴
殷積階庭常數百人秉之御繁以簡常得無事宋世惟
顧凱之亦以省務著績其餘雖復刑政循理而未能簡
事以在縣有能遷補新安太守

徐諮為山陰令精練法理為時所推

陸徽吳人也補建康令清平無私為太祖所善

南齊沈憲為烏程令甚著政績太守褚淵嘆之曰此人
方圓可施

蕭赤斧為錢塘令治政為百姓所安遷正員郎吏民請
留之時議見許

蕭景為永寧令永嘉太守范述曾居郡號稱廉平雅服
景為政乃榜郡門曰諸縣有凝滯者可就永寧令決之
傅琰字季珪山陰令僧祐子也琰又為山陰令山陰東
土大縣難為官長僧祐在縣有稱琰尤明察父子並著

奇績江左鮮有世云諸傳有治縣譜子孫相傳不以示

人

一云琰為武庫令遷山陰令並著能名一縣皆謂之傳聖也

劉玄明有更能為山陰令大著名績傳琰子翽代玄明為山陰令問玄明日願以舊政告新政尹答曰我有奇術卿家譜所不載我臨去當告卿將別謂之曰作縣惟日食一升飯而莫飲酒此第一策也

顧憲之為建康令性清儉強力為政甚得民和故京師飲酒者得醇旨輒號為顧建康醇清且美也

丘仲孚為山陰令居職甚有聲稱百姓為之謠曰二傳
沈劉不如一丘前世傳琰父子沈憲劉玄明相繼宰山
陰並有政績言仲孚皆過之也

吉玠年十七應辟為本州主簿出監萬年縣攝官期月
風化大行

陳殷不佞初仕梁承聖初為武康令時兵荒饑饉百姓
流移不佞巡撫招集襁負而至者以千數

江德藻為新渝令政尚恩惠頗有異績

後魏韓念祖為上黨令徐州刺史尉元表念祖始臨之
初舊民南叛全無一人撫慰招集愛民如子南來民費
僕先等前後歸附戶至二百有餘南濟陰郡睢陵縣人
趙憐等辭稱念祖善于綏撫清身請乞念祖為睢陵令
若得其人必能招集離叛成立一縣獻文詔曰樹君為
民之情如此可聽如請

吳平仁為定陽令有恩信戶增數倍汾州刺史穆羆以
吏民懷之為表請孝文從之

楊機行河陰縣事明達政事斷獄以情甚有聲譽
高謙之為河陰令在縣二年損益治體多為政事

北齊杜弼為光州曲城令為政清靜務盡仁恕詞訟止
息遠近稱之

隋房恭一字慎言沉深有局量達于從政為平恩令有
能名

郎茂初仕北齊為保城令有能名百姓為立清德頌周
平齊後為衛國令歷年詞訟不詣州省魏州刺史元暉

謂茂曰長史言衛國民不敢申訴者要明廉耳茂進曰
民猶水也法令為隄防隄防不固必致奔突苟無決溢
使君何患哉暉無以應之

長孫熾為諫議大夫攝長安令與大興令梁毗俱為稱
職然毗以嚴正聞熾以寬平顯為政不同部內各化

魏德深大業中為貴鄉長遼東之役徵稅百端使人往
來責成郡縣于時王綱弛紊吏多贓賄所在徵斂下不
堪命惟德深一縣有無相通不竭其力所求皆給百姓

不擾稱為大化于是盜賊羣起武陽諸城多被淪陷惟
貴鄉獨全郡丞元寶藏受詔逐捕盜賊每戰不利則器
械必盡輒徵發于人動以軍法從事如法者數矣其鄰
城營造皆聚于廳事吏人遞相督責晝夜喧囂猶不能
清德深各問其所欲任隨便修營官府寂然常若無事
惟約束長吏所修不須過餘使百姓勞苦然在下各自
竭心常為諸縣之最

高世行大業末為櫟陽令劉高為蕭令劉熾為城隍令

俱有恩惠風教大洽獄無繫囚為吏人所稱

唐顏師古隋仁壽中為安養尉尚書左僕射楊素見師古年弱貌羸因謂曰安養劇縣何以克當師古曰割鷄焉用牛刀素竒其對官梁以幹理聞

獨孤懷恩為鄆縣令高祖平京城授長安令在職嚴明甚得時譽

韋承慶調露中為烏程令風化大行

李峴信安王禕第三子樂善下士頗有吏才以門蔭入

仕累遷高陵令政術知名特遷萬年令所蒞皆著聲績
蔣沆乾元中為陸渾蓋屋咸陽高陵四令當軍旅之後
瘡痍未平沆竭心撫綏所至安輯副元帥郭子儀每統
兵由其縣必誠軍吏曰蔣令清嚴幹辦供億固當有數
士衆得蔬飯見饋則已無撓清政其為時人所稱如此
闕播大厯中為河南府兵曹攝職數縣皆有政能

田庭玠魏博節度使興之父幼敦儒雅不樂軍職起家
為平舒丞遷樂壽清池東城河間四縣令所至以良吏

稱

王正雅穆宗朝為萬年令時京邑號為難理正雅抑強扶弱政甚有聲會柳公綽為京兆尹于帝前保稱帝命以緋衣銀章就縣宣賜遷戶部郎中

後唐賈復累為鎮冀屬邑令所蒞有能政

劉遠清泰初為鉅野令縣民張廷煦等舉留遠詔曰月限外量留一年

李溫美清泰中為博州武水令縣民二百舉留溫美詔

本限外留一年

王遵美為密州諸城令考限欲滿部人以善政舉留時已除替人特減一選

晉李顥美為武陽令性廉謹大著政聲

任沉為青州邑益都令縣民舉留勅量留一年

孟承誨為宗城令秩滿以百姓舉留移常山景城令皆有善政

宇文頡為汝州襄城令縣民舉請勅月限外量留一年

李殷為太谷令北京上言殷釐務公廉以德化下獄無
囚繫刑無鞭扑薪水之事不擾于民力賦輿之數不失
于公程三時勸農躬行田井乾糞曝餼裹行而食一邑
熙熙長幼有序流者歸復如戀父母今考秩垂滿衆情
願留敢希明恩重令治任詔下褒美量留一年

周司徒詡清河人後唐明宗之鎮邢臺詡往謁之甚見
禮遇命試吏于邯鄲歷永年須城今皆有能名

景範初以明經擢第歷貝州清陽簿濮州范縣令皆以

強幹著名

李元懿為青州北海縣令民五千餘詣闕舉稱元懿所任添千戶出稅錢贖疋萬勸課百姓種樹十三萬于縣廨內種樹千其年早霜北海不損田諸縣蝗不入縣界泥龍求雨無應李令笞龍責之即日雨足民有詞訟當面剖斷出俸錢修公廨置什物當李令在官曾將其事于本州舉請前使劉銖以為阿附例遭決責令以元懿之政望更賜李令三二年時元懿已授宋城令以縣民

堅請遂復為北海以獎之

遺愛

觀夫寄百里之命布一同之政若乃清白自處風教外
行訢合民情允臻王化則有因伏臘以放囚繫勸農桑
而成歲事民懷其惠吏不忍欺頌德以立碑畫像以配
祀故先民有言曰善人為政歿且不朽其是之謂乎
西門豹為鄴令鑿十二渠引河水灌民田皆溉至漢時
長吏以為十二渠橋絕馳道相比近不可欲合渠水且

至馳道合三渠為一橋鄴民人父老不肯聽長吏以為
西門君所為也賢君之法式不可更也長吏終聽置之
漢朱邑少時為舒桐鄉嗇夫廉平不苛以愛利為行未
嘗笞辱人存問耆老孤寡遇之有恩所部吏民愛敬焉
後遷大司農病死屬其子曰我故為桐鄉吏其民愛我
必葬桐鄉後世子孫奉嘗我不如桐鄉民嘗謂烝
嘗之祭及死
其子葬之桐鄉西郭外民果共為邑起冢立祠歲時祠
祭至今不絕

焦贛為小黃令化行縣中舉最當選三老官屬上書願留贛有詔許增秩留

後漢卓茂初為密令是時王莽秉政置大司農下部丞勸農桑遷茂為京丞密人老少皆涕泣隨送

魯恭為中牟令會遭母喪去官吏人思之

王喬為葉令及卒百姓乃為立廟號葉君祠

韋義為廣都長以兄順喪去官廣都為生立廟後為甘陵陳二縣令及卒二縣吏民為義舉哀若喪考妣

寒郎為濟陽令以母喪去官百姓追思之章和元年和帝東巡狩過濟陽三老吏人上書陳郎前政狀帝至梁名見郎三府為辟首由是辟司徒府

楊仲績為祁令甚有德惠人為立祠

劉寵為東平陵令以仁惠為吏民所愛母疾棄官去百姓將送塞道車不得進乃輕服遁歸

姜詩為江陽令卒于官所居治鄉人為立祀

宋登為汝陰令後為潁川太守病免卒汝陰人配社祠

之

王渙為雒陽令病卒百姓市道莫不咨嗟男女老壯皆相與賦歛致奠醊以千數渙喪西歸道經弘農民廉皆顧襲按于路吏問其故咸言平常持米到雒為卒司所鈔常亡其半自王君在事不見侵枉故來報恩其政化懷物如此人思其德為立祠于安陽亭西每食輒弦歌薦之

陳寔為太丘長修德清靜百姓以安以沛相賦歛違法

乃解印綬去吏人追思之

荀淑為當塗長歷朗陵侯相及卒二縣皆為立祠

劉陶為順陽長

又云名駒
駮為滄陽

以病免吏民思而歌之曰邑

然不樂思我劉君何時復來安此下民

蜀董和為成都令縣界豪強憚和嚴去訖益州牧劉璋
轉和為巴東屬國都尉吏民老幼相携乞留和者數千
人璋聽留二年

晉荀勗為安陽令轉驃騎從事中郎勗有遺愛安陽生

為立祠

陸雲為浚儀令郡守害其能屢譴責之雲乃去官百姓追思之圖畫形像配食縣社

孔奕為全椒令在官有惠化及卒市人若喪慈親

南齊樂預為永世令民懷其德卒有一老嫗行擔解菽若將詣市聞預死棄擔號泣

周顥為判令有恩惠百姓思之

梁樂藹為龍陽相以父憂去職吏民詣州請之葬訖起

馬

劉香為臨津令有善績秩滿縣人三百餘人詣闕請留
勅許焉

蕭景為永寧令以疾去官永嘉人胡仲宣等千人詣闕
表請景為郡不許還為驃騎將軍

傅岐為始平令後去縣民無老小皆出境拜送啼號之
聲聞于數十里

隋劉曠高祖開皇初為平鄉令在職七年風教大洽及

去官吏人無少長號泣于路將送數百里不絕

魏德深煬帝大業中為貴鄉長百姓不擾稱為大化遷
館陶長貴鄉吏人聞之相與言及其事皆歎歔流涕語
不成聲及將赴任傾城送之號泣之聲道路不絕既至
館陶闔境老幼皆如見父母貴鄉父老冒涉險難詣闕
請留有詔許之館陶父老復詣郡相訟以貴鄉文書為
詐郡不能決會持節使者韋霽杜釐等至兩縣詣使訟
之乃斷從貴鄉貴鄉吏人歌呼滿道互相稱慶館陶衆

庶合境悲哭因而居住者數百家後與賊戰沒于陣貴鄉館陶人庶至今懷之

房彥謙為長葛令超授鄭州司馬吏民號哭相謂曰房明府今去吾屬何用生為其百姓思之立碑頌德

唐張元濟隋大業中為武陽令務以德教訓下百姓懷之

高敞為通義令以善政稱去官後人吏樹碑頌其德

崔務智為博州清平令以歲滿當去職百姓懷其善政

詣闕請更留一年制許之

韋景駿為肥鄉令後為趙州長史路由肥鄉人吏驚喜
競來犒餞留連經日有童稚數人年甫十餘歲亦在其
中景駿謂曰計吾去此時汝輩未生既無舊恩何慙懃
之甚也咸對曰比聞長宿傳說縣中廨宇學堂館舍隄
橋並是明公遺迹將謂古人不意親得瞻覩不覺欣戀
倍于常也其為人所思如此

崔縱為藍田令寬明勤謹德化大行縣人請立碑

薛珏為渭南令以清白尤異聞遷昭應令縣人請立碑
紀政珏因固讓不受

裴耀卿為長安令在職二年寬猛得衷及去官縣人甚
思詠之

晉史圭為樂壽令里人為之立碑

課最

夫郡縣者國之藩維令長者民之父母欲親其民必修
其政則有立神明之譽興廉讓之風吏民悅服獄訟和

平清白尤異課績連最莫不升諸公朝待之異數所以
三考黜陟前王令典五等優劣後世準繩不然清濁不
分善惡何勸乎

漢卜式為緄氏令緄氏便之遷成臯令將漕最

為縣令而又使

領漕其課最上

趙廣漢為陽翟令以治行尤異遷京輔都尉守京兆尹
王尊行美陽令事宣帝行幸雍過虢尊供張如法而辦
尊雖行美陽令而就虢供張也
以高第擢為安定太守

義縱補上黨郡中令治敢往少温藉

敢行暴虐之政少温藉言無所舍容

也縣無逋事

逋亡也負也

舉第一遷為長陵及長安令

焦延壽守贛為少黃令愛養吏民化行縣中舉最當遷

以課最而被舉故一遷而為他官也

三老官屬上書願留贛有詔許增秩

留

依許留而增其秩

名信臣為穀陽長舉高第遷上蔡長

後漢杜詩為成臯令視事三歲舉政尤異

魯恭為中牟令在事三年州舉尤異

魯丕為新野令視事朞年州課第一

祭彤為偃師長有權畧視事五歲縣無盜賊課為第一
牟融以司徒茂才為豐令視事三年縣無獄訟吏畏而
愛之治有異迹為州郡最

孔奮守姑臧長詔書以奮在姑臧治有絕迹賜爵關內
侯

胡紹為河內懷令政教清平為三河表

陳重舉茂才除細陽令政有異化舉尤異當選為會稽

太守

劉祐除任城令兗州舉為尤異

童恢為不其令青州舉尤異遷丹陽太守

伏恭為劇令視事十三年以惠政公廉聞青州舉為尤異

魏張旣字德容馮翊高陵人舉茂才除新豐令治為三

輔第一

臧旻為盧奴令冀州舉尤異遷揚州刺史

蜀呂義為新都綿竹令乃心隱卹百姓稱之為一州諸城之首

晉鄭袤為黎陽令吏民悅服太守班下屬城特見甄異為諸縣之最

杜軫除池陽令為雍州十一郡最

宋夏侯詳為新汲令治有異績豫州刺史段佛榮班下境內為屬城表轉治中從事史

南齊蕭景為永寧令治為百城最

梁丘仲孚再為山陰令仲孚長于撥煩善適權變吏民敬服號稱神明治天下第一

隋長孫熾建德二年授雍州倉城令尋轉蓋屋令頻宰二邑考績連最遷靖郡守

劉曠開皇中為臨潁令清名善政為天下第一

房恭懿開皇初為新豐令政為三輔之最

房彥謙為長葛令仁壽中文帝令持節使者巡行州縣察長吏能否以彥謙為天下第一


唐劉思穆為深州饒陽令與冀州信都令崔懷巖課績居最

薛珏拜試太子中允兼渭南令奏課第一間歲復以清白尤異聞

路嗣恭始名劔客後歷仕郡縣有能名後授神烏令考績上下為天下最以其能賜名嗣恭

裴向累為京兆府戶曹轉櫟陽渭南縣令奏課皆第一朝廷亟聞其理行擢為戶部員外郎

王播為殿中侍御史授三原令臨所部政理修明恃勢
豪門未嘗貸法歲終考課為畿邑之最



次定回方十二日

冊府元龜

卷四

冊府元龜卷七百二